

ليلة حد اشر

"ديو دراما"

كل 40 ثانية ينهي شخص ما في مكان
ما في العالم حياته

تأليف/
محمد يس

الشخصيات :

- : 30 – 40 عام

= : 30 – 40 عام

- "كشاف مسلط على ساعة رقمية تقترب فيها الساعة من 12:00
وعندما تحين الساعة 12:00(am)

- "يفتح شخص نور الغرفة ثم يتجه لنتيجة مثبتة على حائط ليقطع منها أوراق
عدة إلى أن يصل لورقة مكتوب عليها (11/11) "

- "يجلس على الكرسي ملتقطاً أنفاسه ،تبدو عليه معالم التوتر والقلق ، يضع
رأسه بين يديه ، ثم ينظر للأعلى ، يمسك بصورة موضوعة على المنضدة
ليتأملها ، ثم يقلبها على وجهها"

- " يمسك بهاتفه ، يفتح بث مباشر ، ينظر لكاميرا الموبايل ثم يضبط اتجاه زاوية
الكاميرا ناحية الشباك ،ينهض ليفتح الشباك ، فيشعر بالبرودة ، يعود لارتداء
معطف ، ثم يصعد لحافة الشباك في تردد ورعدة مصاحبة، يهبط من الشباك ثم
يتجول في الغرفة ، يفرك يديه ، يزداد إيقاع التجول والتوتر ، ينظر لكاميرا
الموبايل ، يغلق البث ، لكن سرعان ما يفتحه ثانية ، يصعد للشباك تلك المرة في
ثبات و سرعة ، لكنه يهبط مرة أخرى ليشرب كوب ماء موضوع على المنضدة ،
يخلع الجاكت ، ثم يتجه ناحية الشباك مرة أخيره ويرتقي إليه ، ثم يفرد ذراعيه
في الهواء ويستعد للسقوط"

أصوات متداخلة قادمة من الشارع وتستمر طيلة الحوار التالي :

انزل .. ارجع .. ارجاااااا .. حد يطلب النجدة .. أنت بتعمل ايه ..
انزل .. حد يلحقه .. ارجع .. ارجع ..

" أصوات صريخ و استغاثات "

"تزداد الأصوات تداخلا و تعلو بينما هو يأخذ أنفاسه و يستعد لرمي
نفسه "

"يفتح أحد الأشخاص باب الغرفة فجأة "

= يا ساتر كل ده سلم ؟

- (يلتفت لمصدر الصوت وتبدو عليه علامات
الاندهاش) أنت دخلت هنا ازاى

= زي الناس ، نور السلم مش شغال ليه ؟
 - لو حرامي أحسنك تطلع بعد شوية
 = مسمحكش تكلمني بالطريقة دي
 - أنت مين ؟
 = أنت اللي مين ؟
 - لما أموت خد كل اللي أنت عاوزه
 = برودو فاكروني حرامي ؟ ماشي هسامحك المرة دي
 - مفيش مرة ثانية
 = يبقى أحسن برودو ..
(يتجه للمنضدة الموضوع عليها بقايا طعام ويجلس ليأكل) كل ده
علشاني ؟ بقولك ايه فيه زيتون ؟
 - أنت مجنون ؟
 = أهو أنت اللي مجنون ، أنت واقف عندك بتعمل ايه
 - اخرج برة شقتي يا حرامي
 = أنت اللي واقف على الشباك ، أنا قاعد جوة ، أنت الحرامي
 - ده بيتي أقف زي ما أنا عاوز
 = بتلقط شبكة عندك ؟ **(ينظر لهاتفه)** مع ان الشبكة حلوة جوة يعني
 = **(يقوم بعمل علامات ترحيب ويبتسم في الهاتف المثبت على**
المنضدة) مش تقول ان عندنا ضيوف ؟ ما تيجو تاكلو معنا ؟ **(يرن**
الهاتف فيخلقه) دول هيصعدونا يا عم
 - أنا مش عاوزك هنا
 = ولا أنا عاوزك هنا .. بس على فكرة أنت محتاجني
 - مش محتاج حد
 = محتاج
 - طيب لو جاي تلعب دور الواعظ ، خلص البوقين بتوع الانتحار
 حرام وهروح النار لو قتلت نفسي
 = نسيت الحطة بتاعت نار الدنيا ولا نار جهنم ، بقولك أنت بتجيب
 العيش ده منين ؟ أصلي دورت كتير ملقتش عيش حلو كدة ؟ من
 كارفور ده ؟
 -
 = طيب انزل كل معايا .. انزل ما تنتحرفش على معدة فاضية
 -
 = **(يلتقط ورقة من على المنضدة ينظر فيها ثم يلتقط الهاتف)** معلش
 هعمل مكالمة من معاك .. ألو عاوز ربع رومي وسط ، و نص طبق

- بيض .. متأخرش بقى زي كل مرة .. بقولك مين بيبيع كفن في المنطقة ؟ تمام تسلم .. لا ما تشغلش بالك
- أنت جايب البجاجة دي كلها منين
- = و أنت جايب التطفل ده كله منين ؟ ماتسييني ياعم قاعد في حالي ، أنا جيت جنبك ؟
-
- = لو عاوز تنتحر كنت رميت نفسك من زمان ..
- اخرج .. هتلبسها و هتروح فيها
- = مش يمكن تقنعني وأجي أنط معاك
- يبقى أحسنالك
- = وبعد لما نط ايه للي هيحصل ؟
- هنروح للسلام
- = ليه مش رمسيس ؟
- أنت هتصاحبني ؟
- = مش من مستوايا ولا ذوقي
- تافه زي معظم الناس
- = الأكل يجنن
- أنت وراك حد ؟
- = **(يسجل في ورقة أمامه) جنون ارتياب .. اسمك ايه ؟**
- مش مهم
- = معاك مش مهم أسماء
- أنت غريب أوي
- = مع اني بحاول أقرب
- أنت مين ؟
- = أنا كل حاجة وأي حد
- دابل فيس يعني ؟
- = **(يسجل في الورقة) فضولي و رغاي**
- ايه شغلانتك ؟
- = البشر
- بمعنى ؟
- = بساعد ، شغلانتي أني أساعد ، أسمع اللي مالوش صوت ، أونس اللي مالوش حد ، أحس بالمحتاج ، أو من بفاقد الثقة ، أنقل الحكمة للمتهور ، أقف جنب الضعيف ، أنا بتعاطف وبحس و بكون موجود
- هو أنت مش كنت مت يا غاندي ؟

- = (اقرأ حكمة مكتوبة على ورق النتيجة المقطوع) إن ألم الحياة
يفوق متعتها لدرجة أنني لا أرى متعة في الحياة
- كيفن كارتر ، مصور صحفي منتحر
= مسكين ، خنق نفسه في عربيته
- أنا فاضلي خطوة ..
= على ايه ؟
- أنتهى .. ينتهى الألم
= ومتأكد أن السلام مستنيك النحية الثانية ؟
- أول مرة أتمنى حاجة بالوضوح ده
= ليه عاوز تنتهى ؟
- عشان أنا مش كويس
= ايه فكرتك عن النحية الثانية
- مكان خالي من البشر ومن العذاب
= اللي بيسيب ورقة الامتحان فاضية ويمشي بيبتكر انه ارتاح
- واللي قعد يحاول يحل لمدة 40 سنة من غير ما يوصل لإجابة ؟
= اتعلم وفهم
- أنا مش عاوز أبقي موجود هنا.. عاوز أموت
= الموت للي عاش
- صح ، وأنا معشتش
= جربت تتكلم مع حد ؟
- مفيش حد هيحس
= أنت من حقا تلاقي حد تتكلم معاه
- ربنا موفرليش الحد ده طول عمري
= ربنا بعتهولك في الوقت المناسب
- هههه أنت الملاك المرسل من السما ؟
= مرة صياد كان بيغرق في عرض البحر ، راح صديقنا عشان ينقذه
رفض وقاله ملكش دعوة ربنا هينقذني ، صديقنا مشي ، بعدها بشوية
الصياد كان بيغرق و بيقول ليه يارب ما أنقذتنيش ؟
- لآخر مرة هسألك أنت مين ؟
= انسان مقتنع ان كل انسان من حقه يتسمع ، ولو لمرة واحدة، مرة
واحدة بس على الأقل ، ما تيجي نلعب لعبة انت تتكلم وأنا أسمع من
غير ما أحكم عليك
- (صمت ، ينزل من الشباك في تردد)
= خد (يعطيه ساندويتش) انت متجوز ؟
- كنت

= بتشتغل ايه
- دكتور جامعي
= شغلانة ملهاش لازمة يعني
- معاك حق أنا في نظر كتير من الناس ما بعملش حاجة
- وأنت ؟ ده غير انك ملاك يعني ؟
= أنا صاحب شركة
- شركة ؟
= خلصت كلية التجارة وقررت أبقي رجل أعمال.. عندي فرصة
كتب في سور عتيق
- سور عتيق ؟ ده سور الصين العظيم ؟
= سور الأزبكية
- مبسوط ؟
= بصراحة النهاردة البت هدى ظرفتنني صنية فراخ بالبطاطس
تظبط المزاج شهر قدام
- مين هدى ؟
= الجماعة
- يا بختك
= انت عاوز تعرفني انك مش مشبرق نفسك وكل يوم بتاكل من
مطعم ؟
- يا بختك عشان في حاجة بتبسطك
= امتي آخر مرة فضيت ؟
- فضيت ايه ؟
= دماغك ؟
- ما بيقفش عن التفكير لحظة
= الشارع علمني حاجة ...
- مش عاوز أسمع قصص
= عارف، بس هحكي أصلي رغاي موت ، الشارع بتاعنا حاجة
تانية ، قسوة من اللي بحق وحقيقي .. اللي بشوفه في يوم واحد يشيب
العيال .. بس أنت عارف أنا بعمل ايه عشان أكمل ؟ بفضي دماغي ..
أول لما أدخل بليل ع الولية وأترمي في حضن العيال بنسى أو بعمل
نفسي ناسي ، بسوق العبط يعني .. حكما لو فكرت هتعب ويمكن
أموت روعي
- مفيش خلاص من الألم، مفيش ، دايرة واتقفلت علينا
= أحكيلك في يوم من الأيام .. صحيت على صوت صريخ من الشقة
اللي جنبني ، طلعت أجري لقيت الواد ماسك السكينة لأمه وعاوز

يدبحها ، قلت له أنت مجنون ، هتموت أمك اللي خيرها مغرقك قالي
دي مطلعة عيني. (صمت)

- أيوة وبعدين ؟

= لا خلصت

- (يكتب في نفس الورقة) تأخر عقلي

= تنزلي شطرنج ؟ (يضع رقعة الشطرنج على المنضدة)

-

= تلعب بالأبيض ولا الأسود ؟

- كنت جاييه لابني ، تعرف اني عمري ما لعبت بيه معاه ولا

وعلمته زي ما وعدته

= واطي أوي بصراحة

- قلت ايه ؟

= لا بقول انك واطي يعني

- أوي

= شايف صف العساكر المرصوص ده ؟ هيموت نفسه عشان يطير

زي الفيل ولا ياخذها طوالي زي الطبية ، العسكري من ده يفضلهم

يبصلهم ومايركزش في خطوته لحد ما يصطادوه مع أنه لو ركز في

خطوته ومبصش لغيره هيترقى و احتمال يبقى وزير

- بس أنا عمري ما بصيت غير على خطوتي

= كذاب

- أفندم

= انت كذاب

- أنت قلت مش هتحكم عليا

= عندك حق أنا آسف بس أقصد يعني لو بتركز على خطوتك ، كنت

اديت لابنك الوقت ولعبت معاه، كنت اهتميت بعيلتك

= كنت بشتغل طول الوقت عشان عيلتي

- بس ماتقولش عشان عيلتك .. ده عشان تثبت لنفسك وللناس انك

جامد

= ممكن (صمت) أنا محتاج أقعد لوحدي ما تقلقش مش

هعمل في نفسي حاجة

- ولا تعمل ياعم أنت فاكرنى هزعل عليك ؟

(هاتف (= یرن)

= ألو ، أيوة يا دودو ، لا اتعشي أنتي ، مفيش قاعد مع صديق ليا

كدة ، اسكتي يا بت ده ضاكتور ، يا بت عيب ، عيب بقى ، خلاص

اتصالحت ، لا مش هسهر ، هههههه ، يا بت اختشي ، العيال نامو ؟

طبيب هخلص الميتينج و أجي على طول ، يالا باي ، دودو خلي بالك
على نفسك ، ودفي حالك كدة

(صمت ونظرات متبادلة)

= مش عارف ليه حاسك علوز تقولي أنني منور

(النور يقطع ، انارة الغرفة تختفي)

- منور

= إيه الإحراج ده ؟ بتحط الشمع فين ؟

- خليك هقوم أجيبه **(يحضر شمعة ويولعها و يثبتها على المنضدة)**

أنا بخاف من الضلمة ، يمكن ده سبب يخليني أكمل

= مش لازم الأسباب اللي تخلينا نكمل تبقى عظيمة

- أنت مكمل ليه

=: عندي زرعة كل يوم بسقيها على أمل اني ألاقها في يوم زهزت

وطرحت خضار

- الحمد لله مقولتش الجواب المعتاد **(بسخرية)** أنا عايش عشان

العيال و المدام

= ما الزرعة دي هي دودو والعيال

- كل دي أسباب بنضحك على نفسنا بيها عشان منشوفش الحقيقة

= وايه هي الحقيقة ؟

- الحقيقة هي الحزن والمعاناة ، الصراخ المكتوم من الألم ، الحقيقة

هي النهاية التعيسة

= آخر مرة كلمته امتي ؟

- مين ؟

= **(يشير باصبعه لأعلى)**

- معتقدش انه فاضي يستقبل مكالمات مني

= محدش ممكن يستقبل مكالمات في أي وقت غيره

- بيرد عليك ؟

= بيرد عليا

- اشمعنى انت يعني ؟

= لما تفتحله قلبك ، يفتح عليك و يمدك بالنور

- طبيب ماتقوله ياخدني ؟

= في يوم هياخدك بس هو سايبك لسة لسبب

- أنا فقدت علاقتي بالسما من وقت طويل

(يعود النور)

= هيبيبيبية النور جه

- أنا عاوز أكون أي حاجة إلا نفسي ، عقلي مايفكرش غير في النهاية، غير في الموت

= **(يكتب في الورقة)** مصاب برهاب الموت

- أنا نفسي أبقي خشبة في الترابيزة دي ، خشبة منسية ، ساكنة، ثابتة ملهاش أي علاقة بالعالم المريع

= وأنا نفسي أبقي شاكوش عشان أدبك على دماغك

- احترم نفسك

= الله هو فيه خشبة بتحس ؟

- شايف الشقة المضلمة اللي هناك دي كانت كلها نور وسعادة ، أب وأم وعيالهم عايشين في دفا وحب ، كل الناس بتحسدهم عليه ، فجأة ، في لحظة ، الأم تعبت مفيش شوبة وماتت ، الحزن سيطر على الأب و نساها نفسه والعيال انفرط عقدهم ، كل ده حصل فجأة ، من غير مقدمات، الشقة اللي كانت بتشع طاقة الأمل لكل الجيران بقت خرابة ، والناس بقت بتتلاشى تبصلها..

= مصير الأب والعيال يفهمو ويرجعو أقوى بعد الاختبار

- سنة الحياة القبح ، قولي على أي قصة حقيقية انتهت نهاية سعيدة ؟

شاورلي على حب فضل بنفس الشغف ؟ كل النهايات تعيسة ومقبضة

= نهايات طبيعية ، لازم نقبلها ونتصالح معاها مش نعجل بيها ،

(اقرأ من ورق النتيجة) "هناك احتمال أن يتوج مسعانا بغير الهزيمة

، ما دمنا قررنا أن لن نموت قبل أن نحيا" ..

- رضوى عاشور ،مما تنتش منتحرة بس ماتت مهزومة شر هزيمة،

بعد ما الورم نهش عضم راسها

= وقفت في وش المرض 35 سنة ، 35 سنة بتقاوم بشرف ، وماتت بشرف ، ماتت محاربة مش منبطحة

- مش هتفرق في الآخر خسرت

= قريت في الجورنان قريب ان كل 4 ثواني بينتحر شخص ، حوالي مليون شخص في السنة ، مليون شخص.. نصهم على الأقل مأخدوش المساعدة اللازمة ، أنت مش لوحذك في الضلمة

- تعرف ؟ أنا مش عاوز أكون سعيد ومنشكح ، أنا عاوز أكون مرتاح ، بس مرتاح

= اشرب **(يعطيه كوب ماء ليشرّب)** في لسة حاجات كتير أنا متأكد أنك بتستمتع لما تعملها ، الشطرنج ده مثلا بتحب تقعد تمخمش وتكسب خصمك في أقل وقت ، الكتب المتربة اللي في مكتبتك دي مستنياك تقراها وتسافر في حكاياتها، أكيد بتحب الصيف أو الشتاء وليك طقوس معينة بتعملها ، طقوس بسيطة بتسعدك ، أكيد ليك

- ممكن تقعد ؟
- = (يجلس سريعا .. يلتقط الهاتف) ألو ، سك على الجبنة والبيض
- (يغلق الهاتف) اطلبلي نص فرخة بقى
- أنت على طول سعيد كدة؟
- = لا أحد وأربعاء بس ، بقية الأيام عادي
- (شاردا) أنا مش فاكرا آخر يوم عادي عشته كان امتى !
- = طيب ما تفتكر كدة
- ممكن وأنا عيل صغير في ابتدائي
- = يا ضنايا ، ده أنت شاييل الهم من بدري
- أنا فاكرا امتى الشبح الأسود المخيف عتش في راسي ، الوحش
- الأسود اللي ببيخ في عقلي عدد مهول من الأفكار السلبية، وراسم
- دايما صورة واحدة واضحة وحضورها بيطغى على أي حاجة ثانية ،
- صورة التلاشي ، الفناء ، كل حاجة بتخلص وتنتهي ، كل حاجة بتفقد
- معناها بالتدريج، الذكريات الصحاب الأماكن المشاعر كله بيتبخر
- وبيتحول بهتان، أنت نفسك بيتولد جواك ميت شخص وكل واحد منهم
- بيموت ، ميت حلم بتدفعهم بايدك ، وفي النهاية بتبقة نسخة غريبة ،
- باردة ، تايهة
- = مسكين .. اتوقعت كثير من الدنيا
- يمكن، (صمت) أنا بقاوم من عشر سنين وأكثر ، كل يوم بقاوم ،
- كل يوم باخد على دماغي وأقول لنفسى ماتتخش ياوض قوم تاني
- وحاول ، بس صدقني احنا بندور في السراب وبنرجع لنفس النقطة ،
- نقطة التلاشي
- = "أريد أن أسافر في النجوم وهذا البائس جسدي يعيقني"
- أنت تعرف فان جوخ ؟
- = ايه مستغرب ، شكلي ميديش ؟
- لا مش مستغرب ، أكيد بتقعد تقرأ في الكتب اللي مبتبيعهاش
- = هو أنا عملت دماغ غير من الكتب اللي متباعتش
- فان جوخ ، هيمنجواي ، فيرجينيا وولف ، خليل حاوي ، داليدا
- وغيرهم ، كل اللي أنهوا آلامهم بايديهم ، الوحش الأسود سيطر
- عليهم تمامًا زي ما سيطر عليا ، أي محاولة للمقاومة هي تضيق
- للوقت .. النتيجة واحدة ، الوحش الأسود هينتصر
- = بس على النحية الثانية فيه لينكولن ، تشرشل ، ستيفن كينج
- وغيرهم من ملايين البشر العاديين نجحوا في معركتهم ضد الوحش
- الأسود، وعدوا الامتحان بسلام
- أنا محتاج، أنا معدش عارف أنا محتاج ايه

= أنت مش محتاج أكثر من انك تعلى دوشة الدنيا من حوليك ، تعليها أكثر وأكثر لحد ما تعلى على صوت الوحش ، محتاج تطلع للشارع وتسمح لصوت الناس يصدعك ، تجري ، وتتخانق ، تتحمق على خسارة فريقك ، تتعصب لكل الأشياء التافهة ، أنت محتاج تعمل حاجات بسيطة نفسك ، تنام كويس ، محتاج تسمع ، تتمشى ، تجري ، ، تقرب ، تتأمل ، محتاج تعرف انك طبيعي وزيك ملايين ، انت محتاج تعيش ، الوحش بيحب الأوض الضلمة ، ويكره الحياة عمى - (بأنفعال) أنا معنديش حياة افهم بقى ، أنا دمرت كل حاجة ودمرت كل حد قرب مني ، مش عاوز أكثر من اني أنفصل عن جسمي ، وأحرر روحي ، ايه اللي حصل لما عليت صوت الدوشة لأبعد حد ، وصلت لنفس النتيجة في النهاية .. كل حاجة ضاغت = اللي ضاع يتعوض .. لسة الحياة قدامك

- الحياة اللي بتحكي عنها حولتني لحصان سبق كل اللي همه انه يسبق اللي جنبه أو يدوس عليه مش فارقة ، عليت صوت الدوشة على الآخر ، عملت كل اللي عاوز ، وأخذت كل اللي احتاجته .. مش فارقة ازاي ، أخذته غصين عن الدنيا ، حرقت كل ذرة في كياني عشان أنجح في المدرسة ، وأطلع الأول ، أرضي أهلي ، وأبقى أشطر من كل قرايبي ، أخذت البنت اللي حبتها ، وأخذت الشغل الي اتمنيته ، وعملت الثروة اللي أي حد يحب يعملها ، دوشة دوشة دوشة ، دوشة ما بتنتهيش ، في الآخر كل حاجة بتموت ، كل حاجة ملهاش معنى = بس الوحش كان اصغر منك وكنت قادر تسيطر عليه - عمرك وقفت وسألت نفسك أنا بعمل كل ده ليه؟ كل الصراعات و دي عشان أوصل لايه في الآخر ؟ كل اللي الدوشة عملته فيا انها حولتني لآلة عملاقة خالية من أي مشاعر ، آلة ملتفتتش يوم لاحتياجات أي حد تاني غير احتياجاتها = : ربنا قال ...

- ربنا ؟ هو موجود فعلا ؟ (يذهب ناحية الشباك وينظر للسماء) رد عليا أنت موجود ؟ طيب تعالى اقعد معنا وقلنا على الحل ؟ قلنا على المخرج ؟ ليه كل ده ؟ ليه كل المعاناة و ... = (مقاطعا) يا عم فوق بقى ، فوق مش انت لوحدك اللي بتعاني ، كفاية شكوى واتعلم من أخطائك

(النور يقطع مرة أخرى ، صممت لثوان)

= دكتور .. يا دكتور ، أنت روحت فين ؟ (يولع الشمعة ويبدأ في البحث عنه في الغرفة وبعد مرور دقيقة من البحث ، يعود النور مرة أخرى وتنفاجئ بوجود (-) على حافة الشباك)

- = لسة مصمم ؟
- صدقني معنديش أي سبب للتراجع
- = عندك أسباب كتير بس أنت مغمي عينك
- الحقيقة واضحة
- = أنت محكتليش عن ابنك
- أنت عرفت أن عندي ابن منين
- = من الصورة دي (يشير لصورة موضوعة في الغرفة)
- عاوز تعرف ايه عن ابني ؟
- = عاوز أبقى أزوره
- هتقدر تديله لحظات حلوة ؟
- = على الأقل هعلمه الشطرنج
- أدهم ابني ، عايش مع أمه ، أنا بحبه ، بحبه أوي ويمكن عشان كدة بعدت عنه وعن أمه ، أتمنى ربنا يعوضه بأب أحسن ، (في تلك الأثناء يفتح = هاتف - ويبحث فيه عن شيء) ابني كله براءة ، بيفكرني بنفسي وأنا صغير ، مبحش براءته لأنها مش ماشية مع توحش العالم ده كله ، عاوز يعمل حاجات بسيطة عمري ما نفذتاله منها تمرين الكورة مثلا ولعب الشطرنج ، مرة جه قالي أنا بحبك أوي يا بابا بس أنت بعيد أوي وقاعد دايم لوحدك كدة ، في الفترة الأخيرة كنت قاصد معدش أشوفه ، نظراته بتدبحني ، أعتقد انه نساني وده أفضل ، ممكن تبقى تاخذ بالك منه وتوديه تمرين الكورة وتعلمه الشطرنج
- = ممكن ده يكون السبب الحقيقي اللي يخليك تكمل ؟
- أنا معدتش أعني أي حاجة لأي حد ، لو مت أريحلي وأريحله وأريح للكل
- = (ينتهي من البحث في الهاتف ويضعه على أذنه) لا أنا مش بابا يأدهم .. أنا صاحب بابا ، أيوة طبعا بابا له صاحب ، خد كلمه أهو يا حبيبي
- ألو..
- صوت : آسف يا بابا بقالي فترة مبكلمكش
- ولا يهملك يا حبيبي أنت عامل ايه
- صوت : الحمد لله يابا بس ادعيلي بقى سنة رابعة دي صعبة خالص
- بس أنت قدها يا أدهم مش كدة ؟
- صوت : طبعا قدها
- ماما بتذاكرلك دروسك أول بأول كدة؟

صوت: أيوة ، بس هي كل شوية قاعدة في جنب تعيط وكل ما أسألها بتعيطي ليه تقولي مبيعطش

- يبقى صدق ماما يا أدهم

صوت: دي بتشتغلني يا عم الحاج

- عيب يا أدهم كدة

صوت: حاضر ، اومال انت فين كدة يا بابا ؟

- في الشغل يا حبيبي

صوت: ارحم نفسك شوية بابا .. (شرطتين يضحك)

- انت وحشتني يا أدهم

صوت: وأنت والله أوي يا بابا نفسي أشوفك زي زمان .

- سلام يا أدهم دلوقتي عشان عندي شغل

صوت: سلام يا بابا .. بابا كلمني على طول أنا بحبك .. باي

(يبكي بشدة ، ثم يمسك بالهاتف مرة أخرى ويطلب ابنه)

- أدهم

صوت: أيوة يا بابا ؟

- عرف ماما اني هعدي عليك بكرة

صوت : هيبيبيبيبيبه

- هجيب الشطرنج معايا عشان نلعب سوا

صوت : أنت أحسن أب في العالم

- يالا روح ذاكر يا حبيبي

(ينزل من على حافة الشباك ، ويذهب ناحية = ويحتضنه)

= هعدي عليك بكرة (يهم بالمغادرة)

- أنت اسمك ايه ؟

= مش مهم .. (يغادر الغرفة)

(يرتدي - معطفا .. يغلق نور الغرفة ثم ينطلق للخارج)